

seradi tra li muri, aspetando *solum* el viver da mar, perchè la terra i sono obsessi, et ricomanda quelli oratori, et conforta si provedi. Et lui à acomodato molti cittadini, haveano li daci per il tempo i sono stà obsessi da' turchi, il pagamento suo sia suspeso per fino harano compito li suo' daci, che compieno questo fevrer, e poi per la Signoria o per lui sarà difinito quanto i haverano a far. Circha el pagamento, è stà contento di cittadini, e al populo menuto à dato in don stara 400 formento, lassato a quel rezimento, lo debia dispensar, e li è stà grato; non à potuto dar più, la Signoria nostra suplirà, e sarà opera grata a Dio. A la furia di stratioti, è homeni pericolosi, à usato molte arte per aquietarli, ma non si pol far, quando tutti non tira per un ragio *etc.* À fato la mostra; à trovato 550 in zercha a cavallo, e altratanti a piedi; e, per darli un pocho di sovention, ha lassato in man di quel rezimento tanti danari, formento e meglio, che li potrà dar lire 6 per uno, e a li capi molto più. Et li stratioti, non erano soliti haver paga, per non haver con che viver, e vanno di continuo a far prede, voleano provision; li dè bone parole, e scrivèria a la Signoria non li mancheria *etc.* E a li fioli dil *quondam* Mexa Busichio, cavalier, che fo morto combatendo con turchi, à dato la provision dil padre, ch'è ducati 16 al mese, a raxon di page 4 a l'anno; è uno fiol, di anni 32, molto ato, e tutti restono contenti; e altri non ha voluto dar provision. E li rectori li disse *in secretis*, volesse acresser a domino Domenego Busichi, cavalier, da ducati 7 l'ha, a ducati 16 al mexe, e a 41 stratioto desse provision per li meriti soi. Non li parse, per non averzer tal porta. Or, diti rectori veneno in galia, et astrenzeva volesse acrescer al ditto Busichio *etc.* Li exortò a taser; *tamen* l'horò *publice* su la pope disseno, esso capetanio si partiva di quella terra, e la lassava molto malcontenta *etc.* Si miravigliò di tal modo; li rispose *etc.*; e par li lassò ducati 1225, formenti e megij; di qual danari ne era ducati 200 per fabbricha, per far una cisterna; e, in conclusion, o volse far, *adeo*, per ditte parole, tutti essi stratioti si sublevò, et ad aquietar questa bestial furia, inzegno human non lo po' far; si che si discharga, si l'intravien o. Essi rectori sono ben uniti, e lauda il capetanio sier Alvise Barbarigo, *licet* habi una gamba, de la qual el sta molto senestramente *etc.*; *tamen* sempre l'è a basso *etc.* Manda la poliza di le artilarie e munition lassate, tolte di la galia sier Alvise Vituri, sier Andrea Bondimier, sier Piero Trivixan, dil capetanio di le galie grosse, di sier Marco Tiepolo, di la nave, patron Marco Re-

mer, e dil barzoto di la Signoria nostra, come il tuto per la poliza *distincte* apar.

Dil dito capetanio, ivi, a di 14, hore 3 di note. Come fece la mostra a li soldati di Napoli, qualli sono pocho più di 300, soto li contestabeli, come apar per la poliza. *Item*, par lassasse li ducati 1025 di monede, per subvenir li stratioti e soldati, a lire 6 per uno, e a li capi e bombardieri molto più, e formento e meio, erano ne li schierazi turcheschi, presi per nostri. Aricorda si provedi presto a quella terra; sia per segurtà circondata tutta di muro; li manca *solum* passa 180, ch'è a marina, e in pochi zorni si faria. À 'uto *solum* esso capetanio, poi è 424
fuora, ducati 8000, *videlicet* ducati 2000 portò sier Francesco Arimondo, et 5500 have da sier Hironimo Contarini, provedador di l'armada, dil resto dil Trivixan, et 500 spexe in sovenir *etc.* Manderà presto li conti; dimanda se li manda danari. *Item*, à lassato a Napoli do galie, per el bisogno di quella terra, a obedientia dil rezimento, *videlicet* sier Nadal Marcello, e la galia sibinzana; e fin brevi di è per expedir uno provedador di l'armada con 6 o ver 8 galie per l'Arzipielago, e si conferirà spesso ne le aque di Napoli, per favorir *etc.* *Item*, à lassato a Napoli più di 100 miera di biscoto, tra quello li è stà mandà per la nave, patron Nicolò d'Alegreto, e di quello li è venuto di Candia, ch'è miera 65; zonse *etiam* do altri navilij da Trane, uno con miara 62, l'altro 117, e sono venuti molto in tempo, perchè in l'armada non era una onza. *Item*, al Scoio, al castello, loco importantissimo, dove era castelan sier Domenego Corner, *quondam* sier Donado, messo per li rectori di Napoli con ducati 25 al mese, confirmato per la Signoria, è stato mexi 20, à voluto licentia, et in loco suo à posto sier Anzolo Guoro, di sier Hironimo, persona discreta, con tuti li modi, salario e condition, *ut supra*, e uno contestabele, Zuan Antonio Lanzeta, da Venecia, cussì consigliato da essi rectori, e grato a tutta la terra, e li à dà page 25, ben che, a tempo di guerra, 400 homeni voria, per la gran guardia ha; e ogni zorni 15 si solea mandar XV soldati di la terra, e *tamen* niun andava; e l'castello restava senza guardia. *Item*, si levò, a di XI, de li, e vene a Malvasia; eri zonse de li a hore 21; dismantò in terra per veder; è fortissima e inexpugnabile, ma non habitada da stratioti; et era prima 400 stratioti, hora ne son 200, tra pie' e a cavallo, per esser el resto amazati da' turchi, come dicono. Questi richieseno il viver; li dete bone parole, e per non haver porto e disonzarsi il tempo, si levò e vene li a la Vaticia; dice chi abandona li